

文

762

912

子:5
部=



中国国家图书馆
NATIONAL LIBRARY OF CHINA

師竹廬聯話卷十

錫山拙翁寶鎮編輯

輓詞

塔忠武公齊布歿於軍李次青方伯元度撰輓語云謚並武鄉侯
湘鄂戰功青史在壽同岳少保古今名將白頭稀咸豐八年羅忠
節公澤南殉節皖中時胡文忠公林翼巡撫湖北撰聯輓之曰上
馬殺賊下馬著書獨將大義扶持真烈士真將軍真理學前表謝
恩後表誓死回憶忠魂酸楚有老母有寡婦有孤兒左文襄公亦
作聯輓云率生徒數十人轉輾而前殺數萬賊下廿餘城亦健將
亦真儒獨有千秋羅山不死報國家二百年養士之恩提三尺劍



中国国家图书馆
NATIONAL LIBRARY OF CHINA

讀等身書是忠臣是信友又弱一个湘水無情均激昂慷慨
毘陵湯貞愍公貽汾字雨生以父殉難臺灣襲雲騎尉官至浙江
副將乞歸寓居金陵焚香鼓琴翛然出塵外工詩善畫山水花卉
均簡淡超脫咸豐三年粵匪陷金陵從容賦絕命詩一章投池死
有某撰偶語輓云三絕畫書詩到頭來大義凜然不傳以才傳以
節一門祖父子怒髮時成仁不讓斯謂之孝謂之忠亦挺拔

江陰何蓮舫太守寓居揚州先曾文正公兩日而卒全椒薛慰農
先生時雨作輓語云詩酒中人翰墨中人江山風月中人薄宦豈
能羈頻年擺脫凡塵逸興豪情跨鶴占揚州勝境循吏一傳文苑
一傳游俠貨殖一傳通材無不可平昔服膺師訓感恩知己騎鯨
爲上相先驅夫椒許誦芬先生爲江左名儒從遊者數百人年七
十卒時周文之太守以微罪戍塞外郵寄一聯云期我第一流政
事文章河嶽在地星辰在天夜雨留悲興國寺從公三十載師生
骨肉死者九泉存者萬里春風難度玉門關洵是才人之筆惟河
嶽星辰於許君稍嫌過分耳

吳芻青廣文汝渤輓錢塘吳曉帆方伯聯云廣廈昔因依記曾烽
火驚心全倚屏藩障南國小春聆警欬何意人天撒手空餘涕淚
望西泠顧受笙先生均亦錢塘人頗精制藝九度秋闈道光辛卯
八月十五夜以疾卒於號舍其表弟梁應來先生紹壬聞而傷之
作輓聯云矮屋痛長眠文戰嘔心竟爾修文歸地下良宵驚惡耗



月圓撒手從今賞月怕秋中有顧君號竹臣者里居未詳其夫人
於某年四月初三日卒時年五十八俞蔭甫太史以楹語輓之曰
鶴壽未六旬仙去後二年再向仙山上壽鶯花過三月佛生前五
日遽歸佛地拈花頗工巧

錢塘梁山舟學士有自輓句云讀書十年作宦十年歸田十年生
有涯如斯而已儒林無傳循吏無傳隱逸無傳死之日尙何言哉
學士早達致仕亦甚早優游林下重宴鹿鳴歸田十年句似未確
蓋欲湊對或於卒之前數十年已作就此耳候補縣佐某歿於蘇
州家貧無以成殮時侯官林文忠公則徐巡撫江蘇慨然贈金并
作輓聯云我亦傷心看今日良朋密友人誰不死想他年寡婦孤

兒諸親友聞之俱陸續而至張蓮舟明經步瀛撰楹帖輓張佩之
太守蘭階云牛衣灑淚寒士同情不圖五十年來偏有殊恩邀北
闕馬革裹尸男兒本分可識二千里外尙留知己哭西臺有王某
早失怙妻亦亡繼娶賈氏甫生一子某遂病卒蓮舟作聯弔之曰
白頭有母黃口有兒俯仰總成未了局泉下誰迎閨中誰送幽明
齊喚奈何天邑商趙雲齋祖母薛孺人五世同堂年逾九十而歿
家曉湘孝廉輓以偶語云不羨佛不羨仙九秩返瑤池壽考轉教
仙佛羨有賢孫有賢子一堂生玉樹曾元也似子孫賢
顧響泉廉訪光旭乾隆壬申進士官至四州按察使學術純正居
官多惠政致仕歸主講東林十餘年壽六十七卒秦小峴侍郎瀛

撰楹帖弔之句云已矣斯人畫像應教徧西蜀傷哉吾道絳帷猶是憶東林絳帷一作講帷杜少京司馬紹祁嘉慶庚辰進士爲福建仙游鳳山等縣知縣除暴築城大有功擢淡水同知引疾歸主講東林多年以脩脯佐賓興寒士均沾惠壽七十六卒有自輓句云電光石火小功名七載臨民差異風塵俗吏齧背鯨身大遊覽半屏殺賊居然戎馬書生半屏山名公多道義交其自敘一篇中謂生平最密者吾祖俊三公會記吾祖作偶語弔之云今人是古人爲英爲靈禮合千秋祭祀兄事兼師事可坊可表服從三月總麻兩人之相契可見矣

鄒壯節鳴鶴爲廣西巡撫時粵逆悉銳攻城戰守三十三晝夜賊他竄以失援鄰境落職歸未久桂林全省陷陸總督建瀛調赴江甯給六品頂戴効用乃逆衆直逼江甯城遂書絕命詩以殉節有人撰楹帖弔之曰有志未成功惜無郭李諸公共襄偉績大名傳不朽幸附顏張之後並著孤忠華荻秋司馬亦有輓詞云大節信無虧死而後已所以報也危城不易守一之爲甚其可再乎貴州黃子壽太史彭年道光乙巳入翰林兩閱月夫人亡曾文正公著輓聯云親見夫君爲文學侍從之臣雖死亦慰但觀人言於父母昆弟無間其賢可知通州孫文節公銘恩先爲禮部侍郎乞假終養左遷太常寺卿咸豐四年復奉命爲安徽學使會粵匪竄安慶遂殉節時曾文正在軍中作輓語云以文來以節歸毅魄長留兩

江上下因孝黜因忠死苦心可質百世鬼神長沙陳岱雲太守殉節安慶時論誤以爲非曾公撰輓聯表明之句云窾口鑠堅金誰知烈士丹心苦大江漾明月常照忠臣白骨寒洵足剖白焉

鄧紫珊大令曾知浙江天台縣事咸豐九年七月初三日病亡配施宜人先兩月卒時許靖甫太守爲金匱令著楹帖輓之句云兩月悵離鸞地下鹿車應其挽一朝悲化鶴天台鳧鳥此長飛薛芷軒明經輓其弟衡瞻太守聯云傷哉雁陣斷衡陽汝病吾不知時汝歿吾不知日已矣虎符持粵右其生也有自來其逝也有所爲集句極現成惟以虎符用於太守似稍廓西鄉錢復初陷於賊中年餘逸出復爲賊迫赴水死顧雲史茂才作偶語輓之曰慨身世如斯猶幸智罄歸晉國歎風波不測依然屈子赴瀟湘用典渾成切合其悼亡聯云歸僅五年幸未養孩留芥蒂病纏三載脫然謝我破菱花亦極簡潔

桃源訓導王月莊先生罵賊被戕一門視死如歸有人作楹帖輓云讀聖賢書臨大節而不可奪立臣子鵠微斯人其誰與歸又聯曰一門忠孝節義千秋俎豆馨香余亦撰聯輓之曰指可截舌可割顛可破一死植綱常浩氣定能寒賊膽父盡忠子盡孝僕盡義千秋馨俎豆貞魂洵足繫人心吾祖俊三公於咸豐庚申四月初十日殉節越數年招魂治喪楊明經鶴秋先生輓云宗族鄉黨縉紳沒齒永孚衆望遺愛儒林忠蹟惟公獨擅千秋秦子惠大令聯

云一死植綱常當黎民鹿銜之交矢石親撾真不愧讀書明理九
重褒忠義看丹詔鳳銜而下馨香崇祀豈僅教纂史垂名杜文山
明經楹帖云光風霽月推周子亮節清標記疊山巖笑拈明經楹
句云公正協輿情到頭來大節孔昭一片丹忱堪報國恩榮封世
職沒齒後精忠不朽千秋青史特標名秦省吾觀察聯云數千里
聞變驚疑病岱暗雲迷慷慨舍生成大義三百兩蒙恩祭葬念露
濡霜降馨香從祀慰忠魂秦係子壻時宦陝寄聯遙輓

王伯陶中翰嘉慶壬申二月十二日生同治丙寅二月十二日卒
華荻秋司馬撰句輓云來日是花朝去日是花朝那堪紅杏枝頭
悄然思舊君年五十五我年五十五可歎黃公墟下獨自傷春頰

覺質而趣又孫旭三先生聯云秉筆入薇垣春蚓秋蛇名滿帝京
天動間散金酬梓里玄旌丹旄魂依祖隴日生寒貴州莫子偲先
生名友芝少時爲名孝廉肆力於許鄭之學旁及列史諸子百家
詩古文詞極淵博黔中文風爲之一變一時名公鉅卿四方績學
之士莫不引重與之訂交湘鄉曾相國尤器重之官之不可延之
幕中亦不諾以一扁舟往來蘇滬間辛未秋卒於興化舟次相國
作楹帖弔之曰京華一見便傾心當時書肆訂交早欽宿學江介
十年常聚首今日酒尊和淚來弔詩人其交誼可見
錢揆初太守勛吾邑西鄉人少負才名詩歌駢文沈博絕麗由舉
人爲內閣中書同治初李少荃宮保統帥上海入參幕事後從勦



自序 盧聯詩 卷十
擒匪卒於濟南宮保作楹帖輓之曰從我陳蔡間千里開關豈料
北征成絕筆與君生死別十年協助那堪南望爲招魂秦澹如都
轉輓以偶語云薄雕蟲技擅倚馬才滬瀆其從軍草檄飛書總輸
汝得四十年終二千石河梁成永訣齊山越水渺愁余蕭質齋太
守聯云最是傷心老母生妻幼子不堪觸目殘杯占劍遺書
益陽胡文忠公林翼薨曾滌生相國撰輓聯云逋寇在吳中是先
帝與薰臣臨終恨事交遊滿天下願後人繼我公未竟勲名劉忠
壯松山字壽卿殉難甘肅年纔三十七曾相國作偶語輓之云勲
名畧同馬伏波骨歸萬里精誠欲效岳忠武壽少二齡湯海秋侍
御鵬以微疾卒於京師相國聞之寄聯輓云著書近二十萬言才
未盡也得謗徧九州四海名亦隨之俱極凋憊

曾文正公國藩學業勲名冠絕一代而自言生平無他長惟輓聯
一卷頗愜己心無他長蓋謙辭也嘉興錢警石先生卒文正撰楹
帖輓之曰禮經默勘羣史校讐篋衍丹黃千卷在陳叟云亡先生
繼逝東南耆舊幾人存時蘇州陳碩甫免先數日死三河之敗李
忠武續寶殉節文正作偶語弔之曰八月妖星半壁東南摧上將
九重溫詔再生申甫佐中興有謝氏女而嫁於何氏耆亡文正輓
以聯云柳絮因風闌內清芬堪繼武麻衣如雪階前稚子總能文
曾公又輓胡文忠林翼太夫人聯云武昌據天下上游看郎君新
整乾坤縱橫掃蕩三千里陶母稱女中人傑痛仙馭永辭江漢感

激悲歌百萬家袁端敏甲三卒於臨淮曾公亦有聯輓之句云屬館
續寄箴言期我勉爲范文子蓋棺有定論何人更議李臨淮雖所
著成卷而得之耳聞固難期其多也

蔣和叔先生大鏞以進士起家兩任治中嚴絕請謁有政聲權貴
忌之輒播以蜚語終無恙同治己巳歿於遼東時朱西山編修供
職京師撰楹帖輓之曰居官清慎勤疊經宦海風波立節不磨強
項令持躬孝友順猶是儒生面目傳家惟有等身書丁植卿孝廉
亦有聯云蔣徑附羊求當年客館征途愛我不殊同氣韓門稱籍
湜此日儒林宦望讓君獨有千秋漢蔣詡於舍前竹下開三徑惟
羊仲求仲常過從孝廉與先生同出某明府門下故慨言及之

合肥江潤生太史輓李勤恪公瀚章聯云於公爲通家子姪行歎
我生磊落多奇曾隨游屐看山笑送閒雲過滄海羣季皆一時俊
傑士爲國事摧傷殆盡獨賸元臣臥閣愁深春草夢池塘敘述交
誼發揮襟蘊面面俱到上聯結語謂勤恪督粵知而不能用在嚴
又陵先生有輓李文忠公聯云使當年盡用其謀知成功必不止
此設晚節無由自見謂世論又當如何簡括中有史筆

秦誼亭先生炳文吾邑風雅士也道光庚子舉人官吳江教諭晚
入賞爲戶部主事以善畫山水擅名其畫風韻瀟灑秀絕人寰初
師高澹游尙爲畦徑所縛五十後專摹西廬遂臻勝境居京師久
於某年卒華荻秋司馬撰楹帖輓之云總說要還鄉最記掛的天

際歸舟到如今乃忽焉絕望何愁無了局縱短少那人間晝債知
此去已悉數清償了植卿孝廉輓以偶語云一官寄興四海論交
難忘雪後金焦親爲我寫子舍棠甘孫枝林立試問人間福慧誰
似公兼張筱亭明經作楹句輓之曰教我作酒狂謂酸不可醫莫
沾染書迂習氣如公眞健者奈技無與並也消磨名士精神吳芻
青廣文輓以聯曰半生酒地花天嵇阮之交無俗客幾幅殘山膽
水倪王而後有傳人陽湖呂庭芷編修作聯弔之云見吾家三世
惟公頻年京國開樽獨許鄭同參末座聞角里諸賢無恙大好溪
山如畫不留摩詰住仙源吳縣馮景亭中允亦弔以聯句云采菊
仰高人正九日樽前洗瓊誰傾元亮酒思蘓違夙願歎二泉山外
歸帆空載米家船切卒於京師并切辭世在重九節時也

錢塘袁蓉生明府簡齋太史之曾孫也同治癸亥歿於海陵金眉
生都轉安清撰聯弔之句云園林鍾阜袍笏申江人世太匆匆可
憐玉樹芝蘭竟成斷梗平白悲歡倉黃患難舊情都歷歷從此天
荒地老不了傷心杜文山明經友房吾邑之名下士也習舉業外
兼工詩古文詞辛未秋卒於嶺南其自輓聯曰竟至死乎瘴雨蠻
烟孤客櫬莫非命也銷魂化魄五羊城侯石琴孝廉謂死字換斯
字更得神又有遺聯示子姪云負債纍纍願兒曹竭力仔肩勿使
我償來世歉平居碌碌期汝輩卧薪嘗膽莫令人笑此宗衰侯孝
廉煒撰楹帖弔之曰獨客悵乘桴那堪海角天涯一夕班荆成永



自竹廬聯詩 卷十
訣大招嗟自輓最痛蠻烟瘴雨幾篇牘稿壓歸裝張筱亭明經輓
以偶語云避亂共流離歎頻年郭外焚芻未老已悲存者寡遠游
成幻夢痛仲子牀前易簣臨危猶念別時言其婿卽曉湘從兄哭
以聯云天不可知算來羈旅十年應有文章傳海外吾將安仰痛
絕河梁一訣空留魂魄返吳中數聯俱凄婉動人

同治壬申二月初四日曾文正公國藩薨於兩江任其門下士瑞

安孫琴西觀察衣言獻輓聯云人間論勲業咸謂如周召虎唐郭
子儀豈知志在禹臯別有獨居深念事天下仰文章殆不愧班孟
堅歐陽永叔却恨老來籍湜更無侍坐雅談時洗盡惡習卓然名
貴可傳也歸安江小雲觀察清驥撰楹帖以輓云生民擬山海鳳

麟應五百年名世歷廿四考中書正學懋躬修帝資奇勲高柱石
翊運際風雲龍虎統天地人爲儒立德功言不朽救時安宇內公
應無憾補金湯句語典麗較琴西則遜較他人爲優高柱石指庚
午壽辰恩賜勲高柱石匾額而言其幕府海甯陳小圃主事方坦
輓曰將相萃門牆更合一家昆季再造乾坤如公獎薦賢才偉量
高勲邁千古儀型仰山斗獲窺濂洛淵源韓歐軌範念我追隨江
皖景行親炙垂十年江甯陶華堂別駕寶善作偶語弔之曰末秩
荷陶成北斗山高方欣大廈瞻依翹首久欽文潞國鞠躬眞况瘁
南天星隕遽失中流砥柱傷心如喪武鄉侯李少荃相國時總督
直隸寄楹語云師事近三十年火絕薪傳築室忝爲門生長威名



震九萬里內安外攘抗世難逢天下才此尋常酬應之作兩人身分交情尙未十分透達薛慰農太守時主講尊經書院撰輓聯云一个臣休休有容頻年燹理餘闕小隊出郊坰慣向山中尋魏野萬戶侯綿綿勿替當代元勳佐命大名垂宇宙豈徒江左重夷吾楚北王鼎臣刺史定安輓云微夫子吾誰歸是秦漢以來第一人物以天下爲己任自伊周而後無此規模吾邑薛叔耘副憲福成在其幕中十餘年相知最深作楹帖輓之云邁蕭曹郭李范韓而上大勳尤在薦賢宏獎如公悵望乾坤一灑淚窺道德文章經濟之隆私淑亦兼親炙迂疏似我追隨南北感知音未入幕前已有交誼故言私淑上下聯起語亦非虛譽蓋紀實也

貴州王芑初司馬慶元令常熟咸豐十年城陷同治二年隨營克復仍知昭文縣事買良田營廣廈擇牛眠地擬家於此而不返矣歲丙寅卒於官丁植卿孝廉在其幕中輓以偶語云虞山舊治琴水新猷萬家生聚依然伊誰之賜陽羨買田桐鄉起塚千古循良有傳復見斯人語語典切丁孝廉於應酬文字不苟如此吾邑楊明經鶴秋先生年逾八秩卒門人陳恩受寄楹帖輓之句云四載列門牆渥被春風檢到遺編珍手澤仄甸尊齒德仰空山斗痛教遙奠熱心昏內閣學士江南主考銘安寄聯輓云恭儉福之興知進家規堪厲俗文章壽以世老泉手筆有傳人曾姪孫志濂作楹句輓云矩矱夙親承曰敦行曰勤學曰立身誨勉維殷銘座遵循



期弗失音容今渺隔有遺誅有傳經有著作典型猶在登堂追慕
慄如生姪孫省齋聯云八秩享遐齡福備箕疇來年芹藻重膺方
喜膠庠傳盛事一生崇儉德穀詒孫子此日蓬萊長往痛教宗族
仰遺型紫丞先生代撰

吳門陳佩之部曹輓王魯山先生慶伯聯云故友復聯姻少同學
業長共游庠每上燕臺懷舊雨艱辛成痼疾仰戀慈親俯憐令子
忍聞馬帳起悲風孫勗三明經顯吾邑風雅士也少爲名諸生工
詩能書畫兼精卜筮之術辛未九月初七日不病而卒吾師嚴笑
拈明經作偶語弔之曰勵品果誰如夷考一生所爲固是達者實
謹者登高已有約忽先兩日而死聞之駭然又慘然又一聯曰平
生有襟期有品格有學問有才華超然自得是日猶把酒猶持螯
猶下棋猶作畫遽爾仙游雖率易却有風神侯景文孝廉輓以楹
帖云身世等棋枰而今夜雨秋燈局外更誰留冷眼光陰消圖書
但見殘山剩水人間何處不傷心秦子惠大令輓以偶句云詩書
教子筆墨營生閉戶未嘗談世事狷介自持寵榮不慕居鄉何可
少斯人徽歙項蘭谷撰聯云使我最難忘秋月秋風秋雨夢君常
相見論詩論畫論書王仰之明經亦撰聯輓之句云造物有何權
能窮君不能困君能死君不能病君此去定非閻老意畢生可無
憾以文壽更以詩壽以書壽更以畫壽祇憐未了向平心其繼配
劉梅賦女史輓聯云老成尙有典型何當風雨滿城抱瑟任揮專

壹調丈夫亦憐少子更痛參商異度蓋棺未及洗三期劉亦工詩
畫其幼子仲襄在蓋棺後數日遺腹而生者也

毘陵李申耆先生卒江陰縣令某君輓以楹帖云大夫國人皆所
矜式也後生小子於何問業焉朱紫珊觀察厚墓歿於武昌時封
翁臨川先生猶在堂也丁植卿孝廉著輓語云江漢仰星雲當年
桂苑杏林久已奇材重南國梓桑瞻山斗此日素車丹旛更無長
策慰西河薛渭占明經病亡余胞叔雲栽公作偶語輓之曰別我
何堪最難忘長日清談寒宵對飲活人多矣固應向仙班證果邑
乘留名薛君精醫曾寓余家數年對飲活人皆實事王子泉舅氏
自武昌府任返錫擬暫息復出忽患外症而歿閻丹初中堂敬銘
寄楹帖以輓云甘苦昔同嘗計戶給軍籌餉我慚蕭相國是非今
已定化民教士歌功咸感寇施州丁植卿孝廉弔以聯云生爲英
歿爲靈大孝千秋此去同騎緱嶺鶴簡在心碑在口論交兩世從
今忍食武昌魚其父武愍公於咸豐五年殉節武昌先大父俊三
公製聯輓云平生有學問文章方能臨大節千古惟忠臣孝子乃
可爲真儒深痛吾祖作此未久亦於家鄉辦團守城殉節也

河南固始吳春舫太守政祥於同治初年來錫爲邑宰不數年其
封翁卒吾師張與亭孝廉撰楹帖輓之句云有子播循聲泰伯城
邊稱父母惟公真碩德洛陽會上少耆英家靜之叔祖享壽七十
四於光緒元年卒張與亭師輓以偶語云西河退老淚灑年年幸



令孫連步雲程足慰桑榆晚景北海通家交深世世倘吾父相逢
地下仍聯詩酒前盟薛涓占明經作輓句云篤於禮寡於欲廉於
財每事存先正典型德可知矣少而富壯而康老而健猶及見
孫獲倚福亦宜之其內弟鄒漢源先生輓聯云大耋共興嗟幸石
硯有靈一第竟償垂老願遠遊成永訣歎縑帷無恙百年尙賸未
亡人楊範甫代撰西門外高松舟封翁卒輿亭師亦有輓語云廿
載訂知心欣逢月夕花晨宴賞園亭無俗客一朝驚撒手愁絕名
山勝地經綸鄉國少能人又代其弟蔭軒萼齋作聯云五十年花
萼競榮左右隨肩洵可樂一百日參苓罔效死生分手復何言又
代友人撰聯以輓云湖海廣交遊觴詠管絃成往事風霜摧晚節
園亭花柳總傷神凌雲軒封翁聯云偉岸世無倫治家則儉而中
禮處世則寬而能容鄉里問誰堪繼武下風吾早拜幹事有過人
之才豪飲有兼人之量朋儔安可失斯人張筱亭明經代作

蘇州馮景亭中允卒吳芻青廣文撰楹帖輓云舊雨數從頭君言
環海論交惟余最久懸崖驚撒手誰料高山失仰先我云亡江左
某兩載之間一子一姪俱死友人輓以聯曰去年纔抱西河痛今
日又來東野書錢揆初中翰輓余望之聯曰梁溪按曲茂苑觀花
京華把盞十餘年舊雨常新那堪斗酒隻雞他時酌墓老母倚閭
寡妻在室弱子趨庭三千里臨風一慟共盼素車白馬遠道歸魂
又代友人撰聯云少同里長同游而今撒手歸泉空對晨星悲舊



雨名何存利何在此後開門立戶惟期玉樹快凌雲侯翔千明經
作偶語輓趙梅生茂才云王楊幼慧庾鮑清才記曩時角勝文壇
真後生畏友也父母俱存兄弟無故卽此去身登仙籍豈君子所
樂歟又作長聯弔張鑑堂云一棹沿洄燈窗話別爲箕裘世業囑
我佳兒泮水幸蜚聲誰料喜報兼旬香夢遽隨江月逝卅年奔走
升斗勞人到霜雪華巔未成歸計宦途齊下淚君看浪淘千古旂
愁更比漢流深氣勢浩瀚不愧才人之筆

常州惓心農觀察病歿楊筱荔太守撰偶語輓云偉畧未全施至
今海嶠遺黎重過羊碑應墮淚感恩在知己垂老江湖泛梗追懷
鄂渚曷勝悲楊明經鶴秋先生輓其門人史煥亭茂才聯云腹便
邊笥筆燦江花當時鐵硯爭磨誰道劉蕢終不第母已白頭兒纔

黃口此日玉樓赴召堪嗟李賀竟無年秦研樵封翁卒王仰之明
經作楹帖弔之云半世作齊豫遊欣看曳杖逍遙有令子承歡官
舍一生得春夏氣猶憶解衣磅礴與少年角藝文壇封翁確有此
風趣王君又有哭其師潘啟鈞茂才聯云卜人以告疾不可爲始
信宿瘤能殞命泰山其頽吾將安仰從今佳節廢登高又聯云有
令子能畫能詩所造已堪名世爲多士任勞任怨其後必有達人
子畫堂能詩畫尤精妙任勞任怨指賓與訟事而言

金陵蔣幼瞻孝廉師軾寓吾錫多年倡興文會同志樂從返鄉後
十餘載忽病卒王顯屏廣文寄聯輓云傷心知識無多風雅如君

山色湖光憑管領回首神情似昨淒涼有我斷章零字憶平生他館
英嫡堂兄維鑑患三陰瘡半載而亡侯翔干明經作偶語弔之云
溯卅載舊屠斗室雙親待養一第未邀身世已多艱那堪數月
疴意外竟成千古別記當時共學瓢城君賦雁行我陪鯉對光陰
不轉瞬屈指廿年前事淚痕頻爲九原枯薛撫屏先生輓以聯曰
齊物以觀彭祖不如殤壽大修身爲本顏淵豈羨跖年高趙和筭
明經有聯曰彼蒼何太無情親老子殤未竟天年偏撒手我弟亦
傷不祿才長命短相逢地府可談心顧竹樾先生卒汪葆素茂才
撰楹帖輓云投筆早從戎往來江皖之間朝餐寒雪暮宿荒煙草
檄飛書倚馬萬言人可待持躬猶法古品概漢唐而上學投諸兒
痛深老母征途客館騎鯨一去我尤悲薛昌侯甥病歿余代其弟
鳳皆作長聯云平生剛直世事崎嶇班定遠正望封侯偏教客死
海置回首難尋蝴蝶夢六子未婚三女待字向子平方思了願豈
料遽辭塵界傷心忍聽鶻鴒啼陸引南茂才卒余輓云久約二泉
遊正期勿藥可占相與領湖山勝景忽成千古別此後臨池得暇
共誰談唐宋名人陸君工書法與余最契約遊二泉惜未果
毘陵劉澗枏先生臨終有兩手撒開塵世事一身跳出利名場之
句額曰仰天一笑家春嶠從叔祖撰偶語自輓云十七回塵戰棘
闈一第難邀羞到重泉逢父母廿八載訓蒙梓里半生勤苦應無
餘孽及兒孫曉湘從兄撰自輓聯曰一死極尋常所奇畢世迤邐



定是不才逢聖主生平惟笑傲獨怪頻年摧折誰將劣命叩穹蒼
迺遭摧折因子女早殤悼亡三次而言外舅楊子承孝廉於臨終
前兩月卧病無聊作聯曰卑污非本心所甘此生無忝躁急是終
身之累至死方休其高尙可見

嘉興錢恭勤公應溥薨常熟翁文恭公同龢撰楹帖輓之句爲平
生灑盡憂時淚臨絕猶聞訪舊言蕩口華耕樂封翁爲子隨孝廉
之父於某年卒余外舅楊子承先生輓以聯曰效秦任好輸粟救
災慈能召福德以永年君子詒謀真有數師范希文置田贍族子
已成名孫尤挺秀善人食報正無涯施叔愚廣文卒華荻秋大令
作聯弔之曰人間多有輓歌恐不值先生一笑地下若逢美酒也

應共才鬼千觴常州瞿廐甫方伯輓薛誠伯大令聯云河東風代
有文名與君家昆季寒素論交吳市秋風燕市雨武昌魚同嘗宦
味聽行部士民歌呼哀送沔江春水漢江湖薛撫屏中丞輓某刺
史云雄文富有亞西亞美政歌成于薦子以于薦子歌用於知州
恰切某君撰偶語弔龔子達茂才云公竟渡河七夕佳期成永訣
我將出塞萬方多難且高歌龔茂才卒於七月初七日故言七夕
永訣又某有聯云中服飄然大陸風雲兒輩在城郭猶是斜橋燈
火酒人稀龔君嗜酒每晚必至斜橋肆中暢飲

滿洲柏中堂俊薨京都翰苑某作聯輓云其生也榮其死也哀雨
露雷霆皆主德臣門如市臣心如水皇天后土鑒孤忠中堂因順



天鄉試賄賣舉人情事見殺實其幕賓及吏胥作弊而中堂未知
也楊藝芳觀察母侯太夫人病歿常熟翁文恭公同龢作偶語輓
云何以報親恩有萬戶災黎同聲感泣况聞敦族誼是九旬賢母
隻手經營李文忠公鴻章亦有聯云一笑歸真見五子蜚英諸孫
擢秀八旬備德憶九宸褒善七族稱賢某輓鄒頌丹母云寸草三
春有子悲銜孟東野生芻一束昔賢我媿徐南州華西洲茂才代
某輓林虎侯媳云小謫塵寰此去瑤臺證明月多情夫婿竭來高
嶺哭梅花王顯屏廣文撰楹帖弔章公靜茂才曰鯉庭拜母雁序
論交二十年攻錯情深恨望荆吳一灑淚萱樹榮懷蘭枝系念三
千里程途遙隔仰看河漢倍傷神先大母李恭人辭世外祖王紫
鄰公作輓聯曰哭子淚應枯泉下牽裾聊一慰相夫心早瘁人間
營奠總難償許靜山星使之母病亡楊藝芳觀察輓以偶語云能
仕教之忠巨浪長風貽訓勉成宗慤志欲養親不待春暉寸草銜
哀同廢孟郊詩楊母先兩年仙逝故末句云然

某有悼亡聯云痛我不辰僅留薄命糟糠猶歸泉壤囑卿來世不
遇封侯夫婿莫到人間爲一時傳誦先祖俊三公悼亡句云境歷
艱辛昔日隨余苦能耐世當離亂此時歸去福非輕過彩章孝廉
娶妻半載同房者兩月其妻投井死撰聯輓云卿何奇疾莫能興
可憐半載因緣尙是鏡花水月我豈無情肯輕別待證兩旬孽果
竟成碧海青天先嬪母嵇宜人年六十九精神尙健忽無疾善終

時雲栽公已甚衰頽作悼聯云五十年伉儷相隨離亂撫諸兒困苦艱難閱世久資賢助一二輩死亡可嘆影形傷獨弔淚枯神黯此生猶復誰憐一二輩指十餘年前兩子相繼去世而言家孝廉曉湘兄娶杜宜人僅數載卽卒著悼亡聯云非參苓木草能回歡妖夢無憑竟成實事聽父母翁姑環哭倘性靈不昧何以爲情繼配侯宜人歿悼以聯曰屈指十九年歡少愁多嘗徧艱辛都爲我沉疴二十日房空幃寂相關痛癢更何人又悼再繼配徐宜人聯曰我命竟如何幾同卓立孤峯一無依傍汝來猶未久滿擬圓成全局又付空虛額云六年一瞬

輓聘娶句難有佳者聞王仰之明經言一聯云你何人我何人無端六禮相傳惹出這般煩惱生不見死不見倘若三生有幸再成來世姻緣丁植卿孝廉代王芟初大令作楹帖輓未過門聘室云逮吉有期一夢游仙偏解脫浮生如寄百年偕老亦須臾意議僮生新與上可以並傳吳劄青廣文輓其妾云同是空花怎奈少偏先老將來結果定知我不如卿聞友人言有以翁輓子婦一聯句云望汝生孫心久矣使予顧子淚潸然亦極得體錄之以備一格家曉湘孝廉撰偶語弔過母云挈兒孫一棹南來喜看楊柳依依家山無恙騎鸞鶴隻身西去太息蓮花朵朵世界成空過母茹素奉佛屠八士橋楊樹下同治丙寅攜眷自海門歸未久卒都門某伶生於二月十一日亡於三月晦日有人輓以聯云生在

百花前萬紫千紅齊俯首春歸三月暮人間天上總消魂吾邑杜
晉齋明經卒汪葆素茂才撰楹帖弔之曰十載客都門飲酒論書
才華高出諸君上一朝拋俗障殘編遺稿鐫刻悲無後起賢華景
方病歿余外舅楊子承先生輓以聯曰年相若居相近意更相投
肺腑深交生平有幾同釣遊同几席并同患難童髻舊契寥落堪
嗟外舅又有一聯云合父母昆弟鄰里鄉黨無間言令聞令望論
之孫子以慈幼養老振窮恤貧爲己任實心實力是謂仁人本作
此輓某君因其身分不稱未果能當此者固甚少也

左恪靖與曾文正書函來往每以兄弟相稱不肯稍自謙抑至文
正薨後乃自書晚生輓之云謀國之忠知人之明自愧不如元老
同心若金攻錯若石相期無負平生豈其悔心之萌有不覺流露
者歟吾邑孫咸吉先生於咸豐庚申陷於城歲丙寅其配秦孺人
亡子梅菴茂才扶兩柩而合葬焉孫勗三明經著楹帖輓之云丁
令可歸來傷心一旦招魂瀝膽披肝至死不曾離故土劉綱諧伉
儷撒手六年若夢元旌丹旆此時還共赴佳城汪介予葆素茂才
之弟也性敏慧幼失怙恃同治癸亥從黃叔軒表兄避難昭陽學
詩便工喜讀書寒暑無間斷年十七得癆症病中吟咏不少輟十
九歲卒其撰聯自述云功名富貴總由天卽樵水漁山亦算一生
事業脾肺心肝都是病奈藥爐茶竈虛拋三載光陰葆素作偈語
輓介予云十年憂兵五年憂貧方期手足常依長向案頭同執卷



七歲失恃九歲失怙豈料箕裘難續早從泉下侍亡親頗覺眞繁
動人鄒雲湘先生輓姪某聯云有恨問天廿八載春秋何促無文
祭姪十二郎今古同悲詞意淒惻讀之令人酸鼻

光緒甲申法越之戰徐曉峯中丞延旭撫桂兵敗獲譴後又起用
旬日卒於位時王鶴琴大令以知縣需次徐公相愛殊甚留置幕
中及卒王大令撰楹帖輓之云聖主惜奇才待公以魯曹沫秦子
明違齋志以終恨未覩犁庭掃穴未僚承下問愛我如夏侍郎張
閣部竟知音盡逝忍重彈流水高山侯紀之先生輓楊壽芝茂才
聯云東林深賴經營心力交殫留祠宇北海素稱豪放人琴俱杳
莫生芻楊明經鶴秋先生撰聯輓王閣生太守之父湘帆先生句
云六十年總角深交方期一棹湖山白首相偕娛永日五百里驚
心聞訃幸沐九霄雨露青雲後起慰重泉侯翔千明經代某作偶
語弔秦小岬云哲人萎乎最憶蘆草溪灣藉藉頌聲周縣北先生
歸也從此杏花春雨年年清淚灑江南錢叔懋孝廉作楹帖輓楊
濬泉茂才曰慣招尋舊雨數人雲水浣盧歐茗戰盼君斜照後又
搖落晨星一顆霜風開蔣徑花期負我小春初上聯切每日茶敘
下聯切愛種花及逝世在十月

吉林馬錦江嵯尹卒於淮安楊筱荔太守輓以偶語云今年歲在
辰漢上遺書竟兆康成夢識傳家君有子淮陰致誅殊慚孝綽文
章吾邑裘竹筠封翁病歿於河南孫勗三茂才輓以聯云魂歸故



國三千里名滿中州四十年施叔愚廣文撰聯弔顧竹漪先生云
十年白下重賴提攜縱蠶才他日有成何處報公尺寸一別吳門
遂成永訣倘老父九原相問爲言不肖流離薛仲貞孝廉輓姚子
莊農部聯云病非不起醫已難求數四人藥石爭施請問是誰妙
手吉報未終哀音遽至頃刻間曇花忽謝能毋令我心驚時孝廉
患病未久亦卒言爲心聲固不宜爾也孫茂才又有楹帖輓族人
某云十年蓮幕依人劇憐弱息幼孫未曾識面一旦蓉城作主堪
歎玄旌丹旆空爲招魂家曉湘孝廉撰偶語輓周漱石云已過五
十不爲天只憐失母雛孫呱呱何託便到三公終有死惟此通儒
眞品卓卓可傳漱石懷才不遇子媳俱亡惟與幼孫相依度日

某縣張亨甫才高學博著有思伯行堂集行世與桐城姚石甫爲
同年交姚官臺灣時亨甫從之會禁煙事起姚爲琦善等所忌陷
於獄中亨甫亦被牽連及事解乃釋亨甫寓京都宣武門外楊椒
山先生祠未幾以病卒士論惜之何子貞編修作楹帖以輓云是
骨肉同年詩訂閩江酒傾燕市眞血性男子生依石甫死傍椒山
江陂橋楊芙蓉吾邑善士也於某年卒華荻秋司馬弔以聯曰衣
食常施三讓里中推碩望典型猶在四知堂上仰遺輝吾友汪葆
素代梁蓮峰輓岳母顧恭人聯云兩閱月話別空庭奈客寄雙隄
道路迢迢慚半子卅餘年主持中饋想系聯四世兒孫羅列泣重
陽又代友輓顧某云婚嫁未終何忍舍向平兒女風徽已杳不堪



思子敬人琴秦茵風孝廉輓姪子厚聯曰是何奇疾莫能興最傷
心惟老父得書三千里揮亡兒之涕豈料斯人竟無後更慘目有
寡妻在室十二時抱幼女而啼時子厚之父刑部副郎霖士先生
供職京師意切而言甚哀也

進賢譚蔚春工詩詞文筆亦典雅晚年課蒙於鄉自號東阜主人
同里陳志詰翰苑人也曾官閩粵多年有女隨養任所光復後陳
挂冠歸里父兄相繼逝去女亦病歿譚代其作哭女兩聯其一云
自天涯萬里歸來哭父哭兄誰知淚眼雙枯更哭甘齡弱女把人
世三生勘定種緣種福且願低頭一拜莫種頃刻曇花其二云從
我瓊島游不畏瘴癘從我珠江游不畏風濤誰期一剎那間現女
郎身如夢如幻如影如泡如湯如電問汝過去生有何夙根問汝
未來生有何善果惟囑再出世後爲男子漢無恐無懼無苦無疾
無害無災刻畫入微毫不着迹洵可傳也吾邑吳匆青廣文卒其
外孫楊筱荔太守撰楹帖輓之云一生霽月光風耄老訂成書曾
許文章傳阿士千里愁雲慘雨夢魂驚惡耗獨懸塵榻哭吾公丁
植卿孝廉輓眼科王益堂聯云似如來放大光明可惜良醫未濟
中壽憫斯世太多矇瞖有誰妙手爲起沉疴孫翥三茂才代秦義
立輓姊云吾寡兄弟而弗忍也欲爲煮炊尙可得乎馮夢花編修
作偶語輓唐桐卿廣文曰今日尙何言閻浮界大夢先醒安知非
福善人胡不佑溫處道沉災又告頓失所依楊明經鶴秋先生著



楹帖輓華題蓉封翁曰兩年茅舍聯居薪膽同嘗在昔解愁欣得
友一幅林巒繪影草心誌感從今讀畫總思君因父母遺像遭亂
失囑畫山水一圖以代之所以格外誌感又撰偶句弔周撫于云
竹醉正開筵大臺延賓君尙健菊秋返駕衰年哭友我何堪又
有楹句輓華召棠孝廉母程孺人云茅舍舊聯屠知挽鹿丁年甘
載親嘗齏曰味箐燈勤課讀幸丸熊午夜一枝早折桂林秋

某縣文芸閣才名藉甚冠絕一時惜不得志而死其友王某輓以
偶句云追思往事感不絕於余心同學少年北邙過半曹子桓有
言既痛逝者行自念也殷憂傷人士固惜茲多口文稱千古東海
流傳韓昌黎所謂動而得謗名亦隨之情文並茂風格亦超洵傑
構也秦茵風孝廉哭其子禹臣聯云徒教汝書徒誨汝文汝未成
名胡竟黃泉隨幼婦未養我生未送我死我非必壽何堪白髮撫
孤孫叔父雲栽公歿侯蔚人世丈時宦浙江寄楹帖輓云離亂昔
曾經遍野烽煙旅館頻年同草閣音塵今已杳長途風雪驛人何
處寄梅花同草閣指鹽城同居而言余外舅楊子承孝廉撰楹句
輓姪眉叔明經云悔我遲歸一見病體支離輒令咨嗟搔白首慟
君速去再欲溫言慰藉難從魂夢覓黃泉作偶語輓胞弟子登明
經云失怙十載失恃廿年而今隨侍九原知煩惱都消二老偕遊
極樂園久病克延不病竟歿檢得遺編數卷幸文章有繼兩兒還
是讀書人以上各聯均切合有意味



吾師張與亭大令健文善書有聯輓陸少華茂才云相如善病逸
少工書感懷蛾術同時無多舊雨伯道無兒謝公憐女幸賴鴛原
有託足慰重泉余外舅楊紫丞孝廉於某年治喪所見楹帖約上
餘副茲錄其三通州張季直殿撰郵寄一聯云對榻江隈記否夜
雨深譚情同骨肉扁舟錫麓九服暮年進德蔭及兒孫華子隨孝
廉作偶語輓云鯁直可風分道南學派廉介絕俗延關西清芬陸
耀星庶常弔以聯曰道在矻俗學在修身得此乃一洗道家習
氣清如秋霜白如皦日惟公方不愧清白吏子孫楊筱荔觀察輓
其堂弟少坪曰痛吾弟業未就婚未成電光石火四十年而今已
矣有親姊視爾疾送爾死風急天高重九日此去何之又輓岳父
雲栽公云古誼託松蘿况孤露提攜器許倍增延賞感老懷傷鳳
驥想遺言綿悒硯留應識伯孫賢家曉湘孝廉輓堂兄閣英云從
戎投筆頌秩酬庸一官河水清誰能遣此子幼家貧米珠薪桂有
兄天外遠何以籌之指臨歿時家况甚窘而言

章定安大令撰楹帖弔陶師母云出南宮第一人致君澤民助教
抗宣文前席相函丈踰七秩令妻壽母誦詩傷魯頌終篇烈女馬
大寶許字包文煒幼失母父廷燦貧而寄食於人女寄居舅氏范
四家范子阿金屢調不遂一日偵女寢徑登其閤女號示以刃女
拒益力竟死年十八共鳴諸官捕金置法爲請旌以楹句輓者不
少邑令張佑璧聯云外家非疏逃之親謬云爾小無猜錯住渭陽



成一死聖世當表揚其烈更有雙旌前導樂隨文肅共千秋丁孝
廉培聯云一樹女貞榮士也不良可惜春花魔夜雨千年精衛恨
魂兮來格最宜秋菊薦寒泉墓在錫山麓人望其坊輒敬之

師竹廬聯話卷十終





中国国家图书馆
NATIONAL LIBRARY OF CHINA